

Mid-Day Dogri News Bulletin, 17 October 2025

समे & 12:25 hrs.

<><><><><><>

LG-Relics

उपराज्यपाल मनोज सिन्हा होर अज्ज रूस दे कल्मीकिया खाना होई गए जित्थे ओहू भगवान बुद्ध हुंदे पवित्र अवशेषें गी वापस आहने आहले भारती प्रतिनिधिमंडल दी अगुवाई करा'रदे न। सोशल मीडिया पोस्ट च एल.जी होरें अपने जाने बारै घोशणा कीती। उनें इस पवित्र मौके लेई प्रधानमंत्री नरेंद्र मोदी हुंदा आभार जताया ऐ ते अवशेषें दी वापसी गी अंतरराष्ट्री संस्कृतिक कूटनीति च इक महत्वपूर्ण पल दस्सेआ जेड़ा प्राचीन बौद्ध विरासत दे संरक्षक दे तौरा पर भारत दी भूमिका गी होर मजबूत करदा ऐ।

<><><><><><>

Darbar Move

इक महत्वपूर्ण प्रशासनिक गैऽ तैह्त्त जम्मू-कश्मीर सरकार नै सदिएं परानी दरबार मूव आहली रिवायत गी फही बहाल करी दित्ता ऐ। एहू गैऽ 4 ब'रे दे वक्फे मगरा पुट्टी गई ऐ। अधिकारिक आदेश मूजब श्रीनगर च इसलै कम्म करा'रदे किश दफ्तर 31 अक्तूबर गी ते किश दफ्तर पैहली नवंबर गी बंद होडन। एहू दफ्तर 3 नवंबर 2025 गी जम्मू च खुल्लडन। दरबार मूव आहली रिवायत 2021 च रोकी गई ही।

<><><><><><>

CM Reservation

जम्मू-कश्मीर सरकार नै आरक्षण सरबन्धी कैबिनेट उप समिति आसेआ पेश कीती गेदी रिपोर्ट गी मंजूरी देई दित्ती ऐ ते हून एहू खीरी मंजूरी लेई उपराज्यपाल होरें'गी भेजी दित्ती जाग। मुख्मन्त्री होरें एहू गल्ल कल इक प्रेस कांफ्रेंस गी संबोधित करदे होई आक्खी।

इक सवाल दा परता दिंदे होई मुखमंत्री उमर होरें आखेआ जे समाज कल्याण मैहकमे गी मंत्रीमंडल दा ज्ञापन तैयार करने दा निर्देश दित्ता गेआ ऐ ते मेद ऐ जे अगले किश दिनें च एह प्रक्रिया पूरी होई जाग।

<><><><><><><><>

Dy CM 1 Year

उपमुखमंत्री सुरिंद्र चौधरी होरें आखेआ ऐ जे मुखमंत्री उमर अब्दुल्ला हुंदी अगुवाई आहली सरकार नै अपने कार्यकाल दा इक ब'रा पूरा करी लैता ऐ ते एह सरकार जम्मू-कश्मीर दे लोकें दे सुखने गी पूरा करने लेई प्रतिबद्ध ऐ। उपमुखमंत्री होरें एह गल्ल अनंतनाग ते कुलगाम जिलेंदे अपने व्यापक दौरे दुरान आक्खी जित्थे उनें तकरीबन 9 करोड़ रपे दियें बक्ख-बक्ख विकास परियोजनाएं दा नीह पत्थर रक्खेआ। अपने इस दौरे दुरान उनें लोकें गी आखेआ जे ओह इस सरकार उप्पर अपना भरोसा बनाए रक्खन। उनें इस गल्ला दा भरोसा बी दोआया जे हर इक फैसला लोकें दे हित च होग।

<><><><><><><><>

Proclamation Orders

जम्मू-कश्मीर पुलस नै हिज्बुल मुजाहिदीन दे आपु बनी बैठे दे कमांडर मोहम्मद युसुफ शाह उर्फ सैयद सलाहुद्दीन दे खलाफ सार्वजनिक हुक्म जारी कीता जेड़ा इस्सलै पाकिस्तान च ऐ। एह कार्रवाई डांगीवाचा थाने च दर्ज इक मामले कन्नै सरबंध्यत ऐ। पुलस नै एह घोशणा इक आधिकारिक सोशल मीडिया पोस्ट दे जरिए कीती। बडगाम पुलस नै पाकिस्तान आधारित आतंकी मुजफ्फर दी संपत्ति गैर कनूनी गतिविधिएं दी रोकथाम सरबंधी कनूनी तैहत जब्त कीती।

<><><><><><><><>

GST-Diwali

हाल च कीते गेदे जीएसटी सुधारें करी कारोबार उपपर सकारात्मक असर होआ ऐ ते देआली दा ध्यार औने आहलाऐ ते एहदे चलदे कारोबारियें एहदा सुआगत कीता ऐ। इक मकामी कारोबारी नै आखेआ ऐ जे इस बदलाव कन्नै चीजें-बस्तें दी कीमतें च खासी कमी आई ऐ। इस गैंऽ कन्नै दुकानदार, उपभोक्ताएं गी सस्ते भाएं उपपर चीजां बेची सकडन। ओब्बी त्यौहारी रूतै दरान। इनें सुधारें कन्नै मकामी अर्थ बवस्था गी बढावा थ्होग ते उपभोक्ताएं गी बी राहत थ्होग।

<><><><><><><>

Div Com Smart City

जम्मू दे डिविजनल कमिशनर ते जम्मू स्मार्ट सिटी दे चेयरमैन रमेश कुमार होरें बाहु प्लाजा च बोर्ड ऑफ डायरेक्टर्स दी बैठक दी अध्यक्षता कीती। बैठक च खास मकसद आहली गड्डियां, राजस्व पैदा करना ते पूरी कीती गेदी स्मार्ट सिटी परियोजनाएं दे रख-रखाव पर चर्चा होई। कुमार होरें सी.ई.ओ स्मार्ट सिटी लिमिटेड गी निर्देश दित्ता जे ओहू इंटीग्रेटेड कमांड ते कंट्रोल सेंटर च होस्टिंग डाटा ते क्लाउड सेवाएं दी तपाश करन ते सरकारी मैहकमे गी एहदा प्रस्ताव देन।